

vnsern Angehenden Regierenden gnädigen Herrn / welchen du vns
nach deiner Göttlichen vorsehung / durch Mittel des Testaments zu
einem Regenten verordnet hast / auff daß ihr Gnaden / in die Fuß-
stapffen ihres seligen Herrn Vettern trete / vnd vns arme Vntertha-
nen / als ein Vatter Regiere / damit deine Göttliche Ehr / vnd vnser
Seligkeit gefürdert werde.

Ferner Dancken wir dir / Himlischer Vatter / daß du vnsern
gnädigen Herrn seligen / mit heilsamer erkennnis Gottes Erleuch-
tet / mit gerecht vnd seligmachendem Glauben begabet / durch deinen
H. Geist Regieret / vnd so ein vernünfftiges / Christliches vnd seliges
End verlieden hast: O du lebendiger Gott / verlenhe vns allen / wie wir
alhie versamblet seind / wann vnser letztes Stündlein kompt / auch so
ein vernünfftiges / Christliches vnd seliges End / daß wir durch Todt
vnd Leben zu dir tringen / vnd Erben werden des Himel Reichs.

Laß dir auch lieber Gott in deiner Gnad befohlen sein / die Röm.
Keyf. Maj. Alle Christliche Könige / Ehr / vnd Fürsten / vnd andere
Stände des H. Röm. Reichs / Insonderheit / vnsern gnädigen Herrn /
ihrer Gnaden Ehegemahl / die hinderlassene Fraw Wittib / auch alle
Verwandten vnd zugethanen / wollest sie lieber Gott durch deinen H.
Geist Regieren / Leiten vnd Führen / ihnen frische vnd gesunde Leiber /
glickselige Regierung / frid vnd einigkeit / vnd langes Leben verlenhen /
damit wir also vnder ihrem Schutz vñ Schirm / ein gerühiges / Chri-
stliches vnd Gottseliges leben führen mögen / in aller Gottseligkeit vñ
Erbarkeit.

Erbarne dich auch lieber Gott / vber alle Armen / mache gesund
was Kranck ist / Tröste was Gefangen vnd Betrüb ist / hilff allen
Schwangern / vnd geberenden Frawen / stewre allem Kriegswesen /
vnd vnfrid / vnd verlenhe vns friden / behüt vns vor Pestilenz vnd
Zehrer zeit.

Damit wir nun diese vnd andere wolthaten vnd notturfft er-
langen mögen / so wollest vns barmherziger Vatter / alle vnser Sün-
den verzeihen / vmb deines lieben Sohns Jesu Christi willen / welcher
vns verheissen hat / daß du vns alles / was wir dich / in seinem Namen
bitten werden / gewißlich geben werdest / vnd hat derhalben vns
in wahrem Glauben also heissen betten.

Vnser Vatter / etc.

E N D E.